




海潮音



海潮音

周紹良



5

1922

第3卷 第1-6期



淮阴师院图书馆 582441

上海古籍出版社

中華民國郵政局特准掛號認爲新聞紙類

佛教月刊

第三年第一期

海潮音

姚柏年題

海潮音第三年第一期要目

●圖像

山西大同雲岡石窟大勢至菩薩像
西域寺壓經塔照影

●言論

佛教講演錄序

法源寺同戒錄序

我之世界觀

廣州佛教閱經社宣言書

●著述

妙法蓮華經講演錄(續二年十二期)

觀俱舍論記

●商兌

諦閑法師致殷人菴居士函

與善因法師函

與朱居士函一二

與太虛法師函

與慧融居士函

太虛

梁家義

王心三

雪筠

釋太虛講
周秉清錄

希聲

石扶持

口口

繆篆

侯豐山

●記事

佛教辛酉年鑑之一

湖北歸元寺請太虛法師講經啟

湖南新化佛學研究會之設立

求靜修者鑒

上海居士林記事二則

南洋星洲記事二則

●傳說

釋迦牟尼佛傳

極樂世界遊記

●文苑

佛學大辭典序

寫金剛般若經序

法苑詩林

●雜集

南華索隱

復章紹烈論鬼神書

新年在念佛會演說詞

結壇禮觀音法

奉持華嚴經簡易儀軌

笠居衆生

釋善因

世晉編譯
慧圓校訂

肩仁

顯蔭

鄒幾極

化聲

胡淵如

法念

慧音

慧音

582441

山西大同雲岡石窟大勢至菩薩像



藏 王 大 法 雲 山
藏 王 大 法 雲 山



晉

晉

佛教講演錄序

太虛

古錐就因明果。嘗云即心即佛。但在人論人。不如云即人即佛之尤捷也。善哉陳妄清居士之佛教講演錄。乃以說人發其端也。統觀佛學之詮釋人者。唯有三義。即見於舊新毘婆沙論者是也。一止息意。謂於六趣之中。能止息煩惱惡亂之意。莫過於人故。二忍。謂於世違順情能安忍故。三末奴沙。謂於種種工巧業處。而得善巧。能用意思維觀察所作事故。立世阿毗曇論所云摩窣沙之八義。不異末奴沙。而契經所云人有勝於諸天之三事。亦不外此。蓋末奴沙故勇猛勝。忍故憶念勝。止息意故梵行勝也。據茲推察人世。偏於種種工巧業處而得善巧。能用意思維觀察所作事故。演爲西洋人分析的哲學。我對物的文化。智的生活。偏於世違順情能安忍故。演爲中華人變易的哲學。我對人的文化。仁的生活。偏於六趣中止息煩惱惡亂之意故。演爲印度人還滅的哲學。我對我的文化。靜的生活。然此三各偏。皆於人性不全。故偏於末奴沙。其進境限於阿素洛。偏於安忍。其進境限於欲界天。偏於止息意。其進境善者可至於生空涅槃。不善者則僅至於色無色界禪定而妄執爲涅槃。嗚呼。此人生所由煩擾流轉。而求超脫者。尤每墮外道小乘也。善能全人性以修佛行而圓佛覺。則由人而菩提薩埵而佛陀。夫何遠之有哉。然其道奈何。曰安忍之仁。善巧之智。本真如體之大悲方便妙用。徒以間隔於意我。不能稱體而用。乃成煩擾流轉之業苦。故必還滅惱亂之意以證真如體。然證真如體非以住真如體。乃以空意我之障。稱圓寂妙明之平等真如體。而興不可思議之大悲方便使用也。故人能止息亂意安忍善巧以全厥人性。便爲發菩提心。由之修薩埵行。圓佛陀覺。即人即佛。如是如是。辛酉冬月太虛閱畢言。

法源寺同戒錄序

戒律起源。佛住世日。隨機談說。相爲傳守。滅後弟子。升座結集。名爲一部。八十誦律。大毘尼藏。一百年間。

五師瀉瓶。純是一味。百年後。分二部、五部、二十部。乃至五百。異見競鼓。有如浩波。流傳支那。四律五論。一十誦律。譯六十五卷。是薩婆多部律。一四分律。譯六十卷。是曇無德部律。一僧祇律。譯四十卷。是根本二部窟內上座律。一五分律。譯三十卷。是五部彌沙塞部律。迦葉遺律。唯傳戒本。廣律未流。初來東土。四律並翻。唯四分律。廣流後代。其五論者。一毘尼母論。一摩得勒迦論。一善見論。一薩婆多論。一明了論。此外毘奈耶律。及後譯有部諸律。並傳震旦。其善見論。是解四分律。溯曹魏嘉平。曇摩迦三藏。傳四分戒。又越四年。曇諦三藏。出四分戒本。更越百五十年。姚秦弘始。佛馱耶三藏。譯四分廣律。後五十餘年。元魏文帝延興。五台北寺。法聰律師。敷講四分。道覆、惠光、道雲、道洪、諸師嗣興。各廣著疏。然於諸部。區分未明。有唐智首律師。創五部區分鈔。四分一宗。因以拔異。綜四分疏鈔。垂二十家。惠光略疏四卷。法礪中疏十卷。智首大疏二十卷。名三要疏。稽四分派別。自唐以來。東塔懷素。相部法礪。南山道宣。名三大家。流傳後世。南山獨盛。南山著述。其行事鈔、戒疏、業疏、拾毘尼義鈔、比丘尼鈔。稱五大部。集大成者。允推此師。南山之後。經十三師。至有宋元。照造資持托、行宗記、濟緣記。如次釋行事戒業三要部。南山一派。於斯大彰。元照同時。杭州允堪。著會正記。自爲一派。資持會正。後稱二家。資持一脈。行傳廣遠。後經變亂。教亦衰歇。有明萬厯。重振宗風。古心律師。步叩清涼。親承印證。三昧大師。疏梵網經。見月大師出。止作二持。定庵大師出。毘尼關要。南方律學。賴以顯揚。松隱大師。率衆來都。北方律學。於以昌振。法源本寺。開建戒壇。時在雍正十二年春。文海大師。首傳衣鉢。天月和尙。繼席法位。代代相傳。迄止晚清。戒法不絕。同治以前。春冬二傳。同治以後。年傳一次。光緒中葉。間二三年。光緒末年。歇響至今。十有五載。大法中絕。僧徒嬾怠。罔知振作。房屋傾頽。田土荒失。鐘漁逸韻。戒法波沉。古大道場。不堪回首。繫我法源。愍忠古號。創建唐代。太宗之朝。燕京古刹。法運攸關。爰有道階律師。來主是寺。苦心十載。朝夕孳孳。修葺破壞。重建倒塌。院牆內外。增房三

百。荒侵地畝。多方恢復。二十餘頃。重睹大觀。今年冬季。宏闡毘尼。法源戒法。於以中興。繼斯以往。年年傳授。余以善緣。居鄰古寺。平常過從。夙稔師行。尊嚴佛制。弗稍遺越。此次傳戒。謹依正範。西來古規。北京首建。觀摩之餘。彌深欽仰。戒期圓滿。刊同戒錄。囑爲一序。再辭不獲。薰沐遠溯。戒律淵源。使衆共知。道階律師。法源古寺。與數千年。震旦戒法。興衰關係。民國十年夏曆十二月八日。長沙集生梁家義拜序。

我之世界觀

王心三

世出世間之根本問題。就真諦言之。華嚴經云。「一切即一。一即一切。」又云。「心佛衆生。三無差別。」非一非異。非空非有。非生非滅。非常非斷。中道實相。勝義唯心。就俗諦言之。是本體與現象之差別。非斷滅與進化之相反也。世之論者。執著於現象之物質文明。以爲世界進化之實證。而以出世法爲斷滅。出世法行。則世道滅絕。不悟三界唯心。萬法唯識。羣有幻相。悉由心識所現。心與物質。猶物之本末。若徒以物質之文明爲進化。而不求本心之修證。是不揣其本而齊其末。至以斷滅爲出世法。則又誤識外道邪見爲佛法。佛者覺也。自覺覺他。覺行圓滿。普利有情。應化不盡。謂之斷滅。翻其反矣。然則求世界真正之進化。以出世法攝化世間。唯一無二之道也。大乘入楞伽經云。「爲除有生執。成立無生義。」曠觀情界。惟心不覺。不覺故動。動故有生。有生則與接爲構。日以心鬪。貪嗔與癡。追求無已。皆有生之執也。世之仁人。蒿目而憂世患。蹙蹙爲仁。踉蹌爲義。求其並育而不相害。而卒無濟。是以自古迄今。治日少。亂日多。善者寡。不善者衆。晚近之言民治者。曰「德謨克拉西」。其宗要。曰自由。曰平等。曰博愛。又進而倡共產主義。曰各進所能。各取所需。則謂「布爾薩維克」。其陳義非不高。而勢有所未能。即果能之。權義雖平。功利是尙。情存彼我。畛域未泯。強制其平。無平不陂。首楞嚴經云。「毘舍如來摩持地菩薩頂言。」「當平心地。則世界地一切皆平。」由此觀之。融通本末。唯是一心。若夫不受物轉爲自由。絕待無二爲平等。無緣大慈。

爲博愛。固非世俗所云者可比。卽以無生之義。破有生之執。亦不過因有言無。爲對治之方。非其至焉。若言其極至。則根本解決。唯在斷除爾炎。而契眞如。卽佛卽心。卽心卽佛。徒以慈悲觀佛。猶其淺也。若此五濁惡世。三毒根深。轉迷開悟。厥唯勝義。大乘以度世爲懷。隨緣應世。而不盡斷我執。此所謂我。非執一己之我。以衆生爲我。以衆生爲我者。則以衆生爲公有之眞心爲我。爰本斯義。而作我之世界觀。

廣州佛教閱經社宣言書

雪 筠

佛學者。自利利他。自覺覺他。自在無碍。妙湛圓融。明心見性。去妄顯眞之學也。就世諦而言。卽十施。十戒。三無漏學。六波羅密。三十七菩提分。任舉一義。皆大包天地。細入微塵。能令娑婆衆生轉迷爲悟。轉染爲善。轉苦爲樂。轉凡爲聖。其功德之偉。不可計量。若聖諦則更非言說可能議擬也。是故日本以崇信佛教而勃興。印度以轉尙外道而淪滅。其關係國運之隆替有如此者。一孔之士。輒以佛教爲寂滅無爲。是厭世的。出世的。舍棄人事的。而不知我佛有大雄大力。大獅吼。勇猛精進之大乘妙義也。故昔人謂五戒之行。足以翊王化而致太平。余則謂佛教之在世間。實小叩小鳴。大叩大鳴。欲求眞正之樂利。非此末由。非此不可。

今言佛教對於世界之需要。請先言今日世界之情狀。夫今日之世界。人慾橫流之世界也。唯物之論愈昌。而逐物之心愈熾。五陰糾結。五欲益烈。竭大地生產定率。不足供人欲所需求。於是貧富階級。日益懸殊。生計問題。愈難解決。致不平戾氣。醞釀殺機。強者暴者。操戈劫財。懦者弱者。倡言均產。廿四時中。盡墮蹙額縐眉之羅刹鬼國。數十寒暑。荏苒於爭名奪利之活現泥犁。在昔東亞尙有神道以助刑政所不及。歐洲有宗教以收攝中下之人心。尙不至絕韜而馳。毫無顧忌。自天演論出後。以野蠻殺奪之惡習。易爲文明競爭之美談。弱肉強食。懸爲公例。邪說所播。謬種流傳。舉世若狂。偏重功利主義。日惟窮究物質科

學。製造殺人之具。外交以陰險詭詐爲能。內治惟道政齊刑是務。舍本逐末。甚或倡科學萬能之說。致神道宗教。皆一擊而踣。卒釀成歐戰奇禍。今學者於創鉅痛深之餘。又以爲政府萬惡。軍閥萬惡。於是一躍而倡社會主義。曰各盡所能。各取所需也。曰各盡所能。各取所值也。其陳義不可謂不高。而不知衆生有俱生我執。我執未除。而欲萃聚具足貪嗔癡慢之人。而化國爲家。臻無爲之至治。是蒸沙成飯。磨磚作鏡之論也。觀俄國勞農政府之紛擾可知矣。余固爲贊許社會主義之一人。而又甚不以今之提倡社會主義者爲然也。

吾國學者羨慕歐洲富強。而不窮其所以富強之本。泰西學者朝登其學說於報章。暮卽譯之。而吠聲吠影。無的放矢。無病呻吟。其弊也。國粹日趨淪亡。新舊道德。青黃不接。結果遂成今日社會之現象。嗚呼。放眼熙熙攘攘中。其心術之詐僞。人情之涼薄。品格之卑污。風氣之澆漓。倫常之敗壞。志節之飄忽。孰有過於今日者哉。脫今日而不急起直追。政教並行。必不能撥亂反治。挽回末俗。然而權衡各教。能應時勢之需求。能令中外古今學說。合冶一爐。而無大不包。無小不入者。莫佛教若也。

偏見之士。或執儒詆釋。或執釋詆道。或執道詆耶。而不知四教聖人。對於第二義諦。初無二致。老子曰。無名天地之始。卽肇論之涅槃無名義也。曰有名萬物之母。卽成唯識論萬法唯識也。孔子曰。毋意。毋必。毋固。毋我。金剛經曰。無人相。無我相。六祖壇經曰。心原是妄。知心如幻。故無所著。孟子曰。爲學之道無他。求其放心而已矣。卽佛遺教經制心一處。無事不辦也。莊子曰。得其環中以應無窮。六祖曰。自性能生萬法。大學曰。至誠之道。可以前知。佛說般若無知。無事不知。耶氏曰。上帝卽在爾心。卽華嚴經疏心佛與衆生。是三無差別也。耶氏曰。爾目不能見物。上帝佑爾。故能見物。卽楞嚴經謂是心見。非目見之義也。其餘中庸。南華。及新約。舊約。灑然會合之處。尙多不可勝計。故曰四教聖人。於第二義諦。初無二致。

至於第一義諦。寥寂虛曠。微妙無相。隨之弗得其踪。迎之罔眺其首。所謂瞻之在前。忽焉在後。平等一如。冥冥窅窅。九地乃以交歸。衆聖於焉冥會。故有無絕於內。稱謂淪於外。孔子曰。予欲無言。子貢曰。子如不言。則小子何述焉。子曰。天何言哉。四時行焉。百物生焉。天何言哉。此所以釋迦掩室於摩竭。淨名杜口於毗耶。須菩提無說以顯道。釋梵絕聽而雨花。斯皆理爲神御。玄之又玄。默契道心。說無可說。准此以談。從上諸聖。所見略同。不過老子莊子。語焉不詳。孔氏耶氏。偏重世法。餘或聖清聖和。各鳴一義。後世見仁見智。自起紛呶。此所謂衆生妄知。菩薩偏知。獨我佛得阿耨多羅三藐三菩提爲無上正等正覺。正徧知。故能發大慈悲心。蔚爲一代時教。度世四十九年。說經七千五百。分五乘十宗四十餘派。隨事方便。隨時方便。隨人方便。爲世間解。爲天人師。三千大千衆生。脫輪迴苦。得究竟樂。故曰能無大。不包無小。不入者。莫佛教若也。

善乎赫胥黎之言曰。自有談理以來。未有如佛者也。斯賓塞曰。東方有聖人曰佛。其化人導世斷有可言也。李登曰。淨飯王子之言行。吾人對之不發憤增愧者。未之有也。歐洲自大戰之後。學者漸多醒覺。爲物質文明之惡果。於是又盛倡唯心論以補唯物論之偏。因而研及東印度哲學。又更上溯而及佛學。故紐約去年開萬國佛學研究會。(東亞口日本有派代表)英美均派出哲學博士赴印譯佛經。善哉善哉。歐西哲學大家之批評佛教也如此。英美之重視佛學也又如彼。不可謂非末劫世界之樂觀也。我國居世界佛教之第二位。吾人不思發揚光大之。而猶戀慕西人所渣滓之功利主義。人棄我取。人取我棄。倒行逆施。不亦傾歟。

溯佛教之布化震旦也。下種於周秦。萌芽於漢晉。葱鬱於隋唐。自宋儒竊佛家性理歸儒。抽儒家倫理拒佛。致儒佛交敵。大道寢衰。降及有清末葉。愈益飄零黃落。寺產多被霸佔。僧尼幾不齒於齊民。其故由繇

流多鄙陋無行不學無術所致。然推其遠因。亦甚複雜。茲姑勿具論。惟現在備受種種惡潮冲激之後。士夫僧侶。漸漸起而提倡。自京師佛教總會成立。各省紛紛繼起。其他佛教團體。亦日見其多。且董其事者。皆一時知名之士。獨廣東爲第六代祖降生之地。而闐然無聞焉。

瑛言念及此。未嘗不繞室蹀躞。徬徨終夜。悽然太息歎歎而不能自己也。今幸得省中名宿。各山長老。相與發起廣州佛教閱經社附設佛經流通處。平昔蓄願。一旦獲償。歡喜踊躍。莫可名言。然而佛教中應辦之事亦多矣。何爲而亟亟於閱經社流通處也。曰經爲載道之文。所見不深。所行不久。所見不真。所行不力。行人由信生解。由解起行。由行致證。非經無可遵循。我國自唐武宗滅佛。經律多被摧殘。故禪宗特盛。元明之季。變本加厲。斥教誡律。專務死坐。棒喝狂放。以不立文字謂爲單提向上。致小乘二宗。無人講習。卽三論、天台、法相、賢首諸宗。亦極銷沉。經論妙義。光明久晦。不知廢學絕思。鮮能閑邪別妄。故達摩雖主將心印心。見性成佛。而猶傳楞伽等經於二祖。是可知矣。蓋佛在世日以佛爲師。佛涅槃後以經爲師。況今日邪說橫議。毒中人心。若非先從經義透過。必難決疑生信。

同人等有見及此。因搜集三藏經典。陳列社中。任人閱覽。或借出研讀。並一面照值流通。將來辦有成效。然後再及他事。惟是茲事體大。衆擎易舉。獨力難支。深望邦人君子相繼贊同。共襄盛舉。庶幾發揚光大。變煩惱爲菩提。默化潛移。轉諸苦而成極樂。則未始非末法時期之幸也。

民國十年歲次辛酉
佛應世二九四八年
雪筠居士湯瑛識於廣州佛教閱經社

本刊介紹

佛學大辭典

佛經之理、皆是先得我心之所同然者、本來明白條暢、而人往往視爲難讀者、徒以名句之扞格耳、茲有上海靜安寺路三十九號醫學書局丁仲祐居士所編佛學大辭典、已出版數月、若能人購一冊、置之案頭、則無論何種佛經皆不難讀矣、特敬爲欲讀佛經者告、

素食諸公雅鑒 西四牌樓廣濟寺西四如春南飯館原係葷館現館主劉耀宗發心受持淨戒並將該葷館改爲素館自壬戌年正月初二日起一律淨素不雜葷辛審知西城一帶爲諸大居士會集之所竟無一素食館藉圖小聚所感困難不少此次該館改葷爲素不特於佛法上生出許多便利於營業上亦必蒸蒸日上立見發達以凡物需要過於供給則行銷必暢此商業之原則也我想北城東城南城近來講佛學者不少如能各方俱設一素食館生意亦必旺向於素食小館尤宜多設計京城內外大約可設四五十處一素食館每日便可少殺數十乃至數萬（如魚蝦等）生命多一人素食終其身便可少殺數十萬乃至數萬萬生命若能將全城乃至全國全世界之葷館皆變爲素館全世界之肉食者皆變爲素食對於未改變以前所造殺業所減亦復不少譬如有人行路誤東爲西已行多時猛然覺悟回頭其錯誤亦必日少一日也願食肉以延生命者熟思之願殺生賣肉以延一己之生命者熟思之

北京念佛會同人公啟

